



L'ultim fin dl'edema éel gnü tigní la terza ediziun di campionac mondiai de lüsa alta sön la pista „Gumpfrei“ a Latsch. Tla squadra taliana é ince i ladins che garejëia y porta a ciasa en gran resultat.

En chësc ann à la sajun di liöstri n apuntamënt culminant sön le calënder. I atlec locai y internazional ai podü indo se conforté a partezipé ai campionac dl monn de lüsa alta, tignis do dui agn indo te Südtirol, plö avisa a Latsch. En gran lâlt ti va ai organisadus, che à preparè na pista de buniscimes condiziuns por la gara. Nia ma la buna organisaziun, mo ince le program partì sò sön i 3 dis ne podô nia ester damì.

Begn 81 atlec é ruvà adalerch da begn sis naziuns por se porté a ciasa le pest tan ambì. La squadra taliana, cun ala pert ince 4 atlec da La Val, à podü mostré sò de gragn resultac.

I dui susc alenamënc dl vëindres dan la gara á messü basté por studié jö la ria y asvelta pista y se preparé al miú por les gares ofiziales.

Bele la sabeda éle gnü surande i pröms titui mondiali. I atlec à garejé te döes manchen: tla categoria “Junioren” é la jona atleta da La Val Manuela Rubatscher che fej gran parüda, cun le tēmp de 2’21.39 era la plö asvelta y pó cun gran sodesfaziun pié do le ôr.

En atra atleta da La Val à ince podü garejé por le titul mondial, Brunner Shamira arjunj le cuinto post te söa categoria.

Tla categoria ëi – Master é ince en ladin che pó tra n salt sön le scalin de podest plö alt a pié dô la medaia d’ôr, al se trata de Diego Tschaffert, le campün talian y sēgn ince campün mondial de süa categoria. Cun le tēmp de 2’15.09 ti la stica le ladin a só concoënt austriach numer un, Ehammer Andreas, che stlūj jö cun le tēmp de 2’16.17. Te chēsta categoria é sēnzater ince da alzé fora le bun 9. post de Miribung Carlo, che stlūj jö cun le tēmp de 2’22.35.

La dumënia é l’evënt jü inant cun la terza y ultima manche, cun la categoria di ei y dles eres generala, chisc i plazamenc di atlec ladins: Manuela 7. post, Shamira 5. post y Diego 4. post. Le titul de campün dl monn se aiudichëia le jonn Maximilian Preindl da Valdaora, deperpo che pro les ëres é la austriaca Frischmann Melanie la plö sterscia.

Ultima sodesfaziun dl fin dl’edma: le grup talian cun la soma di mius tēmps, formé dal trio Tschaffert, Preindl y Lambacher se posizionëia al pröm post.

I plazamënc do les prömes döes manchen (sabeda - ëi): [resultac](#)
I plazamënc do les prömes döes manchen (sabeda - ëres): [resultac](#)

I plazamënc do la terza manche (dumënia - tlassifica finala): [resultac](#)



